

Kampo Alegre pa Nos Isla?

Un Kampo Alegre pa nos isla ta un nesidat. Tur prostituta lo ta na un solo lokalidat. Esaki lo fasilidat trahou di polis; nan por tene mihó control riba e ofishi baho aki. Ademas, bastante kabayero stranhero ta bin traha na nos isla. Na lugá di dañá bida di mucha muhénan di nos isla, un sentro di prostitushon ta nèt loke nan tin mester pa aliviá nan frustrashon seksual.

Kada bes en kuando e tópiko di Kampo Alegre pa nos isla ta bin dilanti. E argumentonan por zona rasonabel i lógiko. Ma en realidat nan ta malamente kiboká riba vários punto.

Pa di promé, nan ta argumentá ku mester traha un sentro di prostitushon PA E HOMBERNAN STRANHERO. Ma nos ta gaña nos mes si nos ta pensa ku SOLAMENTE hende hòmer stranhero lo hasi uso di e fasilidat aki. Asta nos ta masha "naif si nos ta pensa ku MAYORIA di e "klientenan" lo ta kabayeronan stranhero.

Ken ta bishitá prostitutanen aktualmente na nos isla? MAYORIA TA NOS MES HENDENAN. E echu aki lo no kambia djis pasobra e prostitutanen ta lokalísá na un sitio. Ta opvio ku si nos ta konstruí un fasilidat asina riba nos pid'i baranka, ta BO tata, BO esposo, BO "hòmer", BO sua, BO ruman hòmer, BO tio, BO primo ku ta bai dal un tèk aya banda...no ta kabayeronan stranhero so! E argumento aki ta solamente un kapa pa hende lokal haña nan gana.

Pa di dos, e argumentonan aki ta purba evitá e konsekuensianan di piká so, no e piká mes. P'esei nan ta rasoná ku relashon seksual ku un mucha muhé di nos isla ta algu muchu mas malu ku sèks ku un prostituta. Esei ta rasonamentu humano. Ma kiku Dios ta bisa? "Apstené boso di fornikashon" (1 Tesalonisensenan 4:3). Dios ta kondená TUR relashon seksual fuera di matrimonio, sea ta ku un prostituta òf un señorita. Ta bèrdat ku e konsekuensianan pa e yùfrou por ta serio. Ma esei no ta hustifiká aprobashon di algu ku Dios ta kondená. I no lubidá ku tin konsekuensia serio pa esun ku ta mete ku prostituta. Entre otro Beibel ta deklará, "Esun ku hasi esaki, ta kaba ku su mes. Herida i desonor lo e haña, i su reproche nunca lo wòrdu kitá" (Provèrbionan 6:32-33).

E di tres kibokashon ta e rasonamentu ilógiko ku mester pèmití piká pa prevení piká...ku nos mester protehá nos yunan muhé dor di ofresé otro muhé. Esei ta puru lokura. Pèmitiendo piká ta hasi piká rende, no mengua! Pakiku nos no ta sigui e mésun lógika den otro área? Por ehèmpel, nos isla ta eksperensia un epidemia di ladronisia. Pakiku nos no ta legalisá hòrtamentu na 1 hotèl so pa nos por protehá otro hotèlnan i e restu di nos isla kontra ladronisia? Esei lo ta un protekshon efektivu? Of pakiku no pèmití uso di droga na solamente un restorant? Esei lo prevení nos yunan di purba e maldita droga? Nos tur sa ku e rasonamentu aki ta ridíkulo! Pakiku anto nos ta aseptá e mésun rasonamentu apsurdo ora ta trata di prostitushon? Kombatiendo piká ku piká nunca ta mengua òf deshasí di piká!

Di kuater, e argumentonan aki ta sali for di e punto di bista ku hende hòmer NO POR ehersé disiplina seksual. Esei tambe ta puru mentira! Hopi hende hòmer NO KE ehersé disiplina moral. Nan ta papia kos immoral, yena nan mente ku pensamentu immoral, wak pelikula i plachi immoral deseñá pa stimulá deseonan sensual, anto ta pretendé ku nan no por yuda ku nan ta kometé aktonan immoral. Ma nan por yuda ku nan a hasi nan mente un kashi di piká. Hesus a laga sa ku echunan ta produkto di pensamentu. "Pasobra fo'i kurason ta sali...kibramentu di matrimonio (adulterio), fornikashon..." (Mateo 15:19). Hende hòmer por ehersé dominio propio, ma mester kuminsá dor di kontrolá nan pensamentu.

Un di sinku kibokashon ta e idea ku tur prostituta lo ta lokalísá na un solo sitio. Kisas tur e prostitutanen stranhero LEGAL lo ta na e Kampo Alegre. Ma ta irealistiko pa pensa ku un sentro di prostitushon lo prevení tur muhé stranhero òf yu di tera (por ehèmpel un drogadikto femenino) di praktiká e "ofishi" baho aki den otro barionan.

Kampo Alegre pa nos isla? E argumentonan por ta bunita, rasonabel, i asta aparentá di gotia di kompashon. Ma Dios Su kontesta ta un "NO!" enfátiko i nos tambe mester para riba ku "NO!"